

Siapa dalang didedah hari ini

**PPPBWPKL desak DBKL
tangkap pihak jual tapak lot**

Oleh Amir Abd
Hamid
amir_hamid@medi-
aprima.com.my

Kuala Lumpur

Kartel dan dalang di sebalik kegiatan jual beli tapak lot bazar Ramadan di sekitar ibu negara, terdedah hari ini.

Itu janji Persatuan Pertiaga dan Penjaja Bumiputera Wilayah Persekutuan Kuala Lumpur (PPPBWPKL).

Pendedahan itu dibuat di Dewan Perdana Tuanku Abdul Rahman Business Centre, Jalan Tuanku Abdul Rahman di sini, jam 3.30 petang.

Minggu lalu, Presiden PPPBWPKL Datuk Seri Rosli Sulaiman dilaporkan berkata, pihaknya melengkapkan bukti kewujudan kegiatan kartel terbabit.

“Yang sebenarnya, isu jual tapak lot bazar ini sedang diperincikan, cuma nak lengkapkan sedikit saja lagi untuk buat hebahan di media.

“Persatuan mendesak Dewan Bandaraya Kuala Lumpur (DBKL), apabila sudah didedahkan nombor tapak lot ini, DBKL perlu terus tangkap, batal dan sita.

“Jelas apa yang saya nyatakan dalam sidang media beberapa minggu sebelum Ramadan, saya nyatakan ada penjualan tapak lot bazar berlaku,” katanya dipetik dalam laporan media 5 Mac lalu.

Kelmarin, turut tular di media sosial, persatuan yang diketuai Rosli, menerjah kawasan siar kaki sebuah kompleks beli-belah di ibu kota yang juga satu daripada lokasi bazar Ramadan.

Antara dapatan beliau,



**“Yang
sebenarnya, isu
jual tapak lot
bazar ini sedang
diperincikan,
cuma nak
lengkapkan
sedikit saja lagi
untuk buat
hebahan di
media”**

*Presiden PPPBWPKL,
Rosli Sulaiman*

menurut video yang tular itu, ada warga asing turut berniaga di kawasan berkenaan.

Sebelum ini, dilaporkan DBKL membuat laporan polis terhadap pihak dikesan mengambil kesempatan memanipulasikan lesen bazar Ramadan pada tahun ini.

Menteri di Jabatan Perdana Menteri (Wilayah Persekutuan), Dr Zaliha Mustafa dilaporkan berkata, kejadian itu agak mengecewakan apabila masih terdapat cubaan penjualan tapak yang dikesan melalui saluran WhatsApp.

“Saya ada nombor telefon individu itu dan tidak teragak-agak mengambil tindakan lebih keras,” katanya pada sesi soal jawab di Dewan Negara, 4 Mac lalu.